

Jan Poets for di Lima, Peru.. Festival Viña del Mar un experiencia inolvidable..



Chichi Peralta y Son Familia durante ensayo pa e Festival Viña del Mar, Chile.

** Aunke mester a sacrifica Aruba su gran celebracion di Carnaval 45, toch mester remarca cu tabata vale la pena presencia pa prome biaha e magno Festival Viña del Mar na Chile, cual tabata un experiencia hamas visto. Cu Jan Poets su propio wowonan, e ta testigo di e grandesa di e festival mas importante di Chile y alaves e continente IBERO Americano.

Presencia di e multitud di periodistas internacional y canalnan di television mas importante IBERO Americano, ta demostra e importancia di e magno festival. Tabata un honor y privilegio di por a forma parti di e delegacion di Chichi Peralta y Son Familia como nan fotografo oficial, cual mester gradici nos musico Hildward Croes, kende cu su influencia perteneciendo na e agrupacion musical di Chichi Peralta, a hunga un rol clave pa e viahe historico aki.

E viahe tambe tabata uno agitante, saliendo for di Aruba cu ALM, for di Corsow cu Aero-postal pa Santo Domingo, for di Santo Domingo cu aerolinea COPA pa Panama, siguiendo pa Lima Peru y finalmente a yega Santiago, Chile, na unda cu un tourbus super moderno a ser transporta pa Viña del Mar, cual tabatin un duracion di 1 hora 1/2.

Yegando e hotel O'Higgins na unda tur e artistanan invita pa e festival ta hospedando, e grupo di Chichi Peralta a ser ricibi pa centenas di periodista y camarografonan, mientras pafor di e hotel tabatin un multitud patras di e baricadnan tabata saluda e grupo. Mester bisa cu e multitud pafor di e hotel tabata constantemente durante tur e dianan di e festival.

Durante e dos dianan cu Jan Poets tabata na Viña del Mar, diabierna

anochi a presencia e presentacion di e famoso grupo rockero Clearence Clearwater Revival, kendenan a duna un tremendo espectáculo, logrando tambe e premio maximo "La Gaviota de Plata". E premio aki ta ser concidera como esun mas importante pa cualkier

artista of agrupacion musical cu presenta dilante e multitud, debi cu riba e aplausonan di e publico e premio aki ta ser otorga y ta conoci cu no ta facil pa logra e aplausonan for di e publico chileno, kendenan ta ser concidera como e publico mas exigente y si nan no ta gusta e presentacion, hasta nan ta abucha e artista den un forma hopi denigrante. Pues no ta nada facil pa un artista presenta riba e escenario di e festival Viña del Mar. Durante e anochi aki tabatin presentacion di tres pais den e competencia "Voz de la

Cancion", cualnan tabata Venezuela, Costa Rica y Brasil. Porcierto e publico no a gusta e presentacion di e representante di Venezuela y cu lagrima na wowo e representante di Venezuela mester a baha for di escenario riba un "BOE" formal di e publico.

Diasabra anochi Chichi Peralta y Son Familia a cera e festival cu un broche di oro, logrando tambe e premio maximo "La Gaviota de Plata", cual a ser logra den un tempo record riba e gritonan y aplausonan di e publico. Remarcable tabata cu hasta esaki a sorprende e MC, kende a expresa "Asi de Rapido"! Remarcable tambe ta cu e popular cantante di Colombia Charlie Zaa, kende a habri e anochi aki, no a logra e aplausonan suficiente pa conquista e premio maximo aki, cual sigur tabata un desepcion pa e artista y cu a ser nota tambe na momento cu el a baha for di escenario. Tambe mester añadi cu e cantante Enrique Iglesias tampoco a logra e premio maximo.

Apesar cu Chichi Peralta y Son Familia tabata e ultimonan pa cera e anochi, e multitud cu tabata un yeno total, a keda te na final pa goza di e tremendo presentacion cu Chichi Peralta y Son Familia a brinda tanto e publico presente como tambe henter e pueblo di Chili cu tabata sigui e festival atraves di Megavision, cual tabata e canal exclusivo di e magno festival. Chichi Peralta y Son Familia cu su ritmo contagioso a electifica e multitud cu su hitnan manera e.o.: "La Ciguapa, Amor Narcotico, Sol de Verano, Me Enamore y esun mas pega actualmente na Chile cu ta "Procura", cual Chichi Peralta mester a ripiti na mas cu un ocasion.

Despues di e exitoso presentacion di Chichi Peralta y Son Familia, Chichi Peralta a ser invadi pa e centenas di periodista y canalnan di television pa entrevista, mientras cu e bus di e integrantesnan a ser invadi pa e masa di e publico pafor di e hotel, cu te hasta e integrantesnan mester a drenta patras di e hotel den e porta di cushina.

Sin drumi pa 50r di mainta mester a viaha pa Lima, Peru, na unda tambe un multitud tabata na aeropuerto pa ricibi e grupo di Chichi Peralta y son Familia. Na Lima, Peru, tambe Chichi Peralta y Son Familia ta gozando di un inmenso popularidad. E hit mas pega actualmente ta "La Ciguapa, Amor Narcotico y Procura". Na tur e canalnan di television por a aprecia reportahenan special cu entrevistanan di Chichi Peralta. No cabe duda cu e dos presentacion di Chichi Peralta y Son Familia aki na Lima, Peru, tambe lo bay goza di un exito sin precedente. E dos presentacionnan lo ta diabierna awor 18 februari den e luhoso "Jockey Club", cual ta un sitio concidera como esun mas renombrado di Peru. Tambe diasabra 20 di februari Chichi Peralta y Son Familia lo tin otro presentacion.

Keda pendiente pa un reportahe fotografico di e magno festival "Viña del Mar" diasabra awor den bo seccion di "Den Ambiente".

Tambe Jan Poets a logra di contrata un cameraman di HTV di Miami, pa asina por presenta e cobertura exclusivo di e magno Festival Viña del Mar pa Aruba durante e programa "POETS TV", cual lo bay ser presenta muy pronto atraves di Tele Aruba.

El a haya 8 luna di prison pa tur e delitonan cu el a haci

Recidivista a presenta den Corte cu short y pia abao

Juez a sak'e for di sala di corte

ORANJESTAD(AAN) -- Ora Fernando Maria a presenta den edificio di Corte, ya Juez a cuminsa trata su caso. Juez a lag'e drenta pa mira su apariencia y a resulta cu e tabata cu carson cortico y pia abao. Juez a sak'e for di sala di Corte ya cu esey ta un falta di respet pa Corte. Diabierna mainta Juez a condena Fernando Maria en total 8 luna di prison pa e delitonan cu el a haci.

Ta asina cu abogado mr. C. Lejuez a presenta pero Maria no. Durante tratamento di e caso, mr. Lejuez a bisa Juez cu Maria a presenta pero e ta pia abao.

Juez a lag'e drenta djis pa mira su apariencia. El a puntra Maria si ta asina e ta kere cu e por presenta dilanti Corte. Juez a bisa Juez cu e tabata

trahando cu un familiar di dje y el a core bin un rato pa su caso. Juez a bis'e pa sali for di sala di Corte y cu ta sigui cu tratamiento di e caso. Su abogado mr. Lejuez a bisa cu Maria ta desmenti cu el a horta for di un auto. Pa loke ta trata e cahanan di refresco, e abogado ta haya cu Maria a recoge e cahanan cu doño di e lugar a benta afor o sea cu Maria no a haci un delito. El a pidi Juez pa no encarcel'e.

Ta asina cu Maria a haya castigo pa e hortamento dia 17 di Augustus 1998, hortamento di cahanan di refresco y a impone 4 luna di prison cu tabata pendiente. Maria a haci e delitonan aki durante su tempo di prueba. En total Juez a conden'e na 8 luna di prison.



Aki por aprecia Jan Poets, Chichi Peralta, Hildward Croes y Salvador Urdanavia kende ta manager di Chichi Peralta. E foto aki a ser tuma den e lobby di e hotel O'Higgins na Viña del Mar, Chile..